

濟南夜紀政錄







寒夜錄

陳宏緒著

叢書成初編

(本印補)

寒夜錄及種一他其

一九三九年十二月初版

一九六〇年五月補印

商務印書館出版

上海洪興印刷廠印刷

寒夜錄卷上

明 新建陳宏緒士業著

凡著書立言而計較於傳與不傳者。政與患得患失之心無異。古之作者不得已而有言。要以暢其旨之所存耳。若必擬議何等乃傳。便已增卻無限躲避。無限逢迎。未見伸紙舐毫之爲樂也。嚴滄浪云。漢魏古詩氣象混沌。難以句摘。晉以還方有佳句。予謂文章亦然。退之平淮西碑。豈可以字句求耶。混沌二字摹寫古詩氣象甚是。平淮西碑亦只是朴穆。然亦須此等題目入手。未可強爲。文章要作便不佳。太史公敍灌夫使酒罵坐。魏文帝典論自敍。韓退之祭十二郎文。柳子厚與許京兆孟容書。直是一混寫來。何曾有意。

文愈短愈要曲折。所謂畫一尺樹。要不可令有一寸之直也。敖子發古文短篇。最宜涵泳。篇法有預先提出而精神踊躍者。有數轉仍藏而氣勢曲折盡妙者。有實事從虛境出者。有閃躲于此而點現于彼者。堪輿家一言以蔽之曰。要乘生氣。爲道學文應作六經語。不當涉語錄氣。爲釋氏文應作佛菩薩語。不當涉禪和氣。

全子棲每爲文。輒入自課菴。一文必三草。十年悟其淺近。盡付之火。生平凡三焚文集。今子棲之文。竟無一篇傳世者。然卽此數語。作者苦心。便已揭示千載。彼祝融氏之烈焰。政子棲之金石也。

黃魯直詩云春來詩思何所似八節灘頭上水船歐陽公云學書如逆風行舟用盡氣力不離本處上灘船與逆風舟自是兩種文章應著氣力處也須嘔心血指一番若但放乎中流聽其所止而休勢必至于拖沓

作手正要癮點相生無癮處亦不足見文心之巧語極盡而味有餘方是文家至境

鄒道鄉先生謂士不可無山林氣節義文章學術大抵皆然山林氣卽醇古之氣也予極喜琴銘四語山虛水深萬籟蕭蕭古無人蹤惟石嵯峨能存此段氣象便是羲皇以上之人便是墳典邱索之著作韓退之自選生平所爲文二十六篇題曰韓子今不知二十六篇之目爲何元儒程夥南有韓文鈔止取十篇以李愿歸盤谷序爲卷首餘九篇則送文暢師送王秀才溫處士楊少尹盛山十二詩五序與燕喜亭記孔子廟碑獲麟解祭鱷魚文也此外雖退之極有關繫之作如平淮西碑諫佛骨表與孟尙書書皆在所不錄而文章之妙如諱辨送孟東野高開上人殷員外序祭十二郎文代張籍與李浙東書悉被刪去而反有取于盛山詩序燕喜亭記足以驗此君之謬妄無識矣近代潮人唐伯元昌黎文編最稱佳選其謂昌黎先生歿歷二百餘年而歐陽永叔始知之然永叔嘗論先生二鳥賦矣其曰光榮而飽則不復云彼爲御史爲侍郎非光榮而飽之日乎天旱人饑之狀佛骨之表抵觸君臣之所大忌烏在其不復云也信如永叔之論未可謂盡知先生也數語亦是確論

偶閱客星紀略有朱晦翁題跋云釣臺故有范公記詞義甚偉後人不容復措手矣中間有江子我一記

獨書作新歲月最爲得體大抵山川佳勝處自應有一篇恰好文字若已被前人作去後來便當放過吾郡滕王閣惟昌黎一記獨絕然畢竟未曾親至其地此等猶可措手若石鐘山豐樂亭岳陽樓亦復紛紛塗抹便爲不度德量力之甚矣但書作新歲月子我真可爲千古師法也

古人畫不從一邊生去此董元宰獨悟之語也文章亦然尙書禮記至矣若管韓荀莊諸書氣勢回而不皆不從一邊生去後人無此猛力但能免起鶻落已是第一好手

王元美云讀子瞻文見才矣然似不讀書者似不讀書最妙無此等境界豈能如萬斛泉源霈然莫禦戴忠甫嘗與龔洳溪論文欲以一字括之忠甫曰其惟聲字乎凡文之抑揚高下輕重疾徐吞吐浮沈起伏頓挫誰非聲者能于此際轉換得清則無之而不清于此際調劑得妙則無之而不妙沈約云若前有浮聲則後須切響陸機云審殿最于鏘銖定去畱于毫芒皆在聲字致意耳因戲謂史記左傳皆有絕妙點板未可任意誦去洳溪撫案大叫以爲知言忠甫又云兩漢文字亦有唐宋人所不肯爲者唐宋文字亦有兩漢人所不能爲者未可矮人觀場

揚子雲抱弱翰齋油素問上計孝廉異語悉集之撰方言十三卷其後王孝孫有河洛語音之作實倣子雲方言爲之但止于中土稱謂而已國朝幅員遼廓四方語音不同恨無好事如子雲者懷鉛握槧以從事于其間但此書決非一人之力可竟須勅州縣令長凡各屬志書俱補入方言一款悉著土音之互異者此書既成一以便官府之聽斷一以佐文字之稽考一以闢津之譏察所繫政非謬小近日

惟劉心蓼太倉州志風俗條內另載方言然亦略而不詳他處則竟未聞有此矣。

古今奇人奇書湮沒散軼者不可勝紀而釋老之徒尤甚嘗欲作二氏文苑志如比邱曇謨鳩摩羅什葛
驛川陶貞白者人立一傳擇其佳文附之又嘉興楞嚴寺刻有漢本大藏于此方撰述較五千四十八
卷頗有增廣予意欲更加搜補另爲藏外撰述一書未知此願得遂否也。

科舉之法行之逾久而應舉者荒疏逾甚因憶昔人有文選爛秀才半之語彼時之爲諸生者較今懸絕
乃爾夫文選之不能頓造于爛雖老師宿學難之爛矣而僅得秀才之半其所謂全者又屬何等耶
歸震川先生云魏莊渠嘗爲余言東廣陳元誠少未嘗識字一日自感激取四子書終日拜之忽能識字
以此知書之神也。

孟之反不伐反者仄字之誤按春秋齊與魯戰孟之仄後入以爲殿竝無之反之名又爲長者折枝折枝
者按摩之謂也劉峻廣絕交論有折枝舐痔之語枝卽肢字非草木之枝此閩友蔡价臣之說价臣名
藩貧而力學所著贅言予嘗爲之作序

价臣又云託孤寄命言託六尺孤而臨大節不可奪如後世霍光之類寄百里之命而臨大節不可奪卽
孟子所謂效死勿去如後世張巡之類雖三句實二事晉史閻纘上疏理愍懷太子冤內引孔子曰可
以託六尺之孤而臨大節不可奪亦以二句相屬朱註以託孤寄命爲才臨大節爲節殊屬牽強
狂簡斐然成章自是三種人簡卽狷者斐然成章通指言語政事文學諸賢僅以一狂槩聖門似非定論

新安朱楓山先生云。孔子年六十八歲。乃始刪詩定書。繫周易作春秋。只數年閒了卻一生著述。蓋是時學問成。涉世深矣。故其述作始可爲萬世法。古者著書多在晚年。

周恭肅潛心學易。所著日記論卦爻變例最確。其釋豫卦云。本義以卦之得名。本爲和樂。然卦辭爲衆樂之義。爻辭除九四與卦同外。皆爲自樂。所以有吉凶之異。諸卦爻爲例不同。每如此。且文王之易與周公。孔子之易。有共貫而發一義者。有旁通而備衆理者。政未可膠柱鼓瑟以求合耳。

偶與但直生宗皋。論放利多怨之旨。直生曰。外人之怨。猶可避也。至于自家怨。則無處可逃矣。予甚擊節其語。蓋放利之人。畢竟心中怨恨居多。所謂小人長戚戚也。

國初名儒劉商卿者。諱夏。字迪簡。深于易學。所著大業圖。惜已亡失。僅存讀易訣一篇。其言曰。庖犧氏之易。易何在也。今六十四卦爻之所以爲象。六十四卦名之所以取義。此則庖犧氏之易書文字矣。在昔夏、商以前。文王、周公、孔子之辭未作。而夏、商聖人君子之讀易。只緣羲皇所制象。因羲皇所命名。而文王、周公、孔子之辭意洋洋。無不具備。今學者果欲明乎易。置身文王、周公、孔子之前。將羲皇制象命名之學。一時打通了。則文王周公孔子所繫辭旨。破竹之勢。無復畱滯矣。無奈古今註易之士。凡千百家。絕不會以伏羲之易。自爲一書。以冠文王、周公、孔子之文。如衣失其領。網失其綱。是教子孫而遺忘其先祖可乎。按陳希夷先生云。羲皇始畫八卦。重爲六十四卦。不立文字。使天下之人。默觀其象而已。如其象則吉凶應。違其象則吉凶反。此羲皇氏不言之教也。易道不行。乃有周孔。周孔孤行。易道復晦。與

商卿此論正相發明。實觀玩之要旨也。

董蘿石年六十有八。慨然北面陽明先生語。悉陽明記中近從吳觀察秋圃處得其遺詩一帙。孤高秀逸。足稱其人。七言律尤佳。如一江明月看山過。小亭魚影弄青天。空山無人石欲語。皆咄咄驚人。而咏豆芽云。蕪蕪亭後得裹封。金甲銀鉤奪化工。濾盡宿泉冰有骨。種成深益土無功。秋涵素質瓊絲胞水泛殘衣黛粒空。野蔌紛紛登俎豆。憑誰爲薦玉玲瓏。如此棘手題。大見工力。蘿石學問未知究竟何似。政當以詩雄視諸子耳。

吟咏景物。固是傳我之意。須知使事亦是寓意。所謂借他人之酒杯。澆自己之壘塊也。要使顛倒由我。譬
如戲場中戈鋌。若在出色優狐元人謂裝外者爲狐手中。定要另生一番光彩。

友人卓珂月曰。我明詩讓唐。詞讓宋。曲又讓元。庶幾吳歌掛枝兒。羅江怨。打棗竿。銀鉸絲之類。爲我明一絕耳。卓名人月杭州人。

予友清江楊機部平湖趙退之。俱爲吟壇推重。而尤長于五言近體。機部贈予有柔木誤冰山之句。退之亦云。癡魚侮釣絲。二詩皆有爲而發。冷眼婆心。直欲喚醒沈夢。

予邑宗子文忠節大類謝疊山所著有玉溪集。予從其後裔輩垣處借觀。蓋元刻也。讀杜遺興云。淵明詩頗恨枯槁子美嘆之非達道。草堂集中多道貧。淵明若見應回笑。山光潭影照青瑠。二公心只二公知。若逢癡漢休言夢。不是詩人莫看詩。此作非子文得意句。然道陶、杜兩公心事。則已欣然莫逆于千載。

矣。

東坡謫儋耳前後和陶詩凡百數十篇子由爲之引詩集中三十一卷皆追和淵明之作也。陸務觀序梅聖俞別集云蘇翰林多不可古人惟次韻和陶淵明及先生二家詩而已是東坡又有和梅之作今已散逸無可考見亦未有知其事者。宣城令姜奇方刻宛陵集竟遺渭南之序益嘆古人著述不幸而湮滅若此類者蓋不可勝數也。

文衡山先生停雲館聞者以爲清閟及見不甚寬敞衡山笑謂人曰吾齋館樓閣無力營構皆從圖書上起造耳。大司空劉南垣公麟晚歲寓長興萬山中好樓居貧不能建衡山爲繪層樓圖置公像于其上名曰神樓公欣然拜而納之自題神樓詩有從此不復下得酒歌明聖問余何所得樓中有真性之句嘗觀吳越巨室別館巍樓櫛比精好者何限卒皆歸于銷滅而兩公以圖書歌詠之幻常存其蹟于天壤士亦務爲其可傳者而已。

今之仕宦罷歸者或陶情于聲伎或肆意于山水或學仙譚禪或求田問舍總之爲排遣不平然不若讀書訓子之爲得也。

只此一天韃靼曰騰吉里回回曰阿思嫣恩女直曰阿卜哈以西番曰難百夷曰法緬甸曰某高昌曰騰克力推之重譯不到之處億萬國土便有億萬稱號彼蒼蒼者亦豈能別其孰爲名當孰爲名不當哉語言文字何處可容執著。

梁次公嘗著壽天說曰人生百年乃是大限過此與深山老藤怪石何異多亦無爲也只要百年之中不夭乃爲壽耳何爲百年之中不夭比如人在午時便當作午時活人若作一過去想則是已時矣午時之身不夭乎若作一未來想則是未時矣午時之身不又夭乎若是真正長生者只須逐時活去在已則爲已之活人不天于已也在未則爲未之活人不天于未也不把眼前日子反擲向空去乃所謂壽乃所謂不夭

禮樂干戈俱屬搶攘推此而洙泗杏壇三千縫掖亦覺多事總不如春風沂水童冠幾人安閒自在喟然一嘆掃卻多少喧囂萬茂先曰要知勞心勞力自有春風沂水只在胸中邱壑所謂天下本無事庸人自擾之也

葉文莊盛云數自一至十惟三平聲八卦惟乾離坤平聲十干十二支皆仄多平少陰常有餘陽常不足君子少而小人多此亦可見

李文節公廷機云禪祇是割得斷堯舜不以天下與子周公爲王室誅其兄皆禪也又云禪卽聖人所謂剛也士大夫處是非恩怨之地能得些禪意將胸中葛藤一切割斷良爲爽脫若不得其意口談何用公談禪學最爲切實與說龍肉而不能飽人者迥異

橋李文節公廷機云禪祇是割得斷堯舜不以天下與子周公爲王室誅其兄皆禪也又云禪卽聖人所謂剛也士大夫處是非恩怨之地能得些禪意將胸中葛藤一切割斷良爲爽脫若不得其意口談何用公談禪學最爲切實與說龍肉而不能飽人者迥異

吳邑徐元美言提學高汝白之諸父隱君子也教汝白以舉子業每嘆曰可惜可惜假令作得狀元亦自枉過一生其後汝白舉進士以書督責之曰汝得一第吾不爲喜而以爲憂此後必驥放肆可錄逐日言行寄我汝白嘆曰吾終身在側豈不我知而憂我放哉試問一老家人曰比舊漸不同矣乃警懼置一簿錄其所爲試自簡點其過不可勝書乃大懼激厲爲學卒爲善士此父固不必言此老家人亦豈非所謂濟以上人耶

羅景綸評昭君詞擊節樂天一絕以爲高出衆作之上予獨有取于儲光羲含蓄無盡頃又得淳熙閒鄭虞任昭君曲讀之至結語云但願夕烽長不驚甘泉妾身勝在君王前道昭君意中事似又不減于長慶矣

莫尙書少虛困官西蜀謁南堂靜師咨決心要使其向好處提撕適如廁聞穢氣以手掩鼻遂有省黃龍寺晦堂老子嘗問山谷以吾無隱乎爾之義山谷詮釋再三晦堂終不然其說時暑退涼生秋香滿院晦堂因問曰聞木犀香乎山谷曰聞晦堂曰吾無隱乎爾山谷乃服但能觸處領略鼻穢馨香都不礙此鼻尖頭也

歐陽公云予曾作憎蠅賦傳之于世蠅可憎矣猶不堪蚊子自遠啞喝來咬人也友人余君士瑞在長安有題壁句云藤棍荆條滿街喝豈無人道不中聽予笑語余云不中聽何妨只莫咬人便休

李文節公攝南王部竹頭木屑事事畱意有縉紳見之曰翰林公亦肯親俗事乎公曰有俗人無俗事天

下國家事何言俗也。如文節真可謂不俗者。彼以詞林沾沾。厭薄一切。殊覺俗氣愈甚。

馮元成云。史稱韋蘇州所至。掃地焚香而超然高潔。余平日閒居。亦與蘇州同好。嘗謂古人稱晚食當肉。緩步當車。余亦謂焚香可以當栽花。掃地可以當營宅。

上海浦小癡名澤。字學著名。一時生平喜睡。不亭午不巾櫛。里中呼爲晏眠人。此可謂得黑甜三昧者。予自晉州城守。目不交睫。廿餘日後。遂習爲固然。每過四更。輒展轉不能安枕。初甚苦之。偶讀宋儒鄭景望雜著。中有一則。欣然錄出。醒時輒諷誦數徧。未幾安寢如常。景望云。余中歲少睡。展轉一榻間。胸中旣無纖毫。頗覺心志和悅。神宇凝靜。有不能名言者。時聞鼠囁唧唧有聲。亦是一樂事。當門老僕鼻息如雷。閒亦爲謬語。或悲或喜。或怒或歌。聽之每啓齒。意其亦必自以爲得。而余不得與也。

予嘗作舒城山寨記。已略言立寨之利害矣。然尙未極其流弊之所底也。胡澹庵有與吉守李寶書紀。一時事變。頗稱痛切。倘兵戈不止。將來必有不幸。如胡公所言者。謹錄出之。以備當局鑑採。書云。數年來盜賊四起。甚者至殺令破縣。其弊正起于山民之寨。寨不平。寇不可止。何則。吉與虔爲接鄰。吉之寇大抵悉自虔而起。然虔人非倚山寨爲之囊橐。其勢不爲寇。今吾州凡八邑。止安成不與虔接壤。七邑皆虔地。與國羣兇往來之時。而山寨又羣兇嘯聚之衝。無一邑不下數十寨。一寨不下數百人。甚者至千人以上。戈甲稱是一鄉之穀粟。盡輸于寨魁之手。一鄉之惡少。盡束于寨魁之權。州縣之刻木。盡餌于寨魁之賂。有一小忿。則羣兇相捉環視而起。名爲復仇。其漸遂至剽掠。又其漸遂爲羣盜官租公賦。連

年不輸小有追捕則據寨恃險敢與州縣抗衡有司不平閒遣官軍討伐而刻木得餌先爲之耳目矣孔子曰家不藏甲邑無百雉之城故春秋書墮郿墮費防此禍也夫邑且不可爲百雉之城而山之豪乃至雉堞凌空戈挺轉雲尙謂國有法乎

寒夜錄卷中

張獻忠用兵最狡。常以少勝多。破舒城時。實叛將孔廷訓句之陷城。獻忠犒賞各頭目已畢。旋引廷訓數之曰。爾不忠于朝廷。焉能忠于我。立斬之階下。時原任太僕鄉濮中玉亦投降數日。見廷訓被殺。股栗無措。獻忠曰。汝鄉紳吾不斬汝。遂授僞禮部尙書。中玉舞蹈謝恩。畱其營中四閱月乃還。初中玉以請托不遂。下石于予。或傳其城陷死難。予擬爲草揭請卹。不意喪心辱國乃如此。此事舒人目擊甚確。而諸生孫秋我亦被賊擄。述其顛末尤詳。孫云。濮旣授僞禮部。餘戶、兵、工三部各有僞官。惟吏、刑則獻忠自領之。不欲以爵人刑人之柄。畀之他賊也。又僞中軍來姓者。號來達子。最爲獻忠親信。其陷合肥諸屬。惟來達子晝夜密謀。諸營皆不與聞云。

王遵巖問龍溪。先師陽明在軍中四十日未嘗睡。有諸龍溪曰。然此原是聖學。古人有息無睡。故曰。向晦入晏息。世人終日擾擾。全賴後天渣滓。厚味培養。方殼一日之用。夜間全賴一覺熟睡。方能休息。不知此一覺熟睡。陽光盡爲陰濁所陷。如死人一般。若知燕息之法。當向晦時。耳無聞。目無見。口無吐納。鼻無呼吸。手足無動。靜心無私累。一點元氣與先天清氣相依相息。如爐中種火相似。比之後天昏氣所養。奚啻什百。龍溪數語。不特養生至論。亦是安禪要訣。

崑山顧夢川性嗜飲。每客至。相與揚搘古今。輒樽罍雲瀉。或謂夢川曰。人可千日而不飲。不可一飲而不

醉于公何如。夢川曰：夫醉者非飲也。人但不可一日不飲。一日不飲，如春之花、秋之月、冬之雪，聖人之書何。客曰：夫然則夏何取焉。夢川遽曰：盛夏不飲，則耳後之風其何從生。客大笑。夢川字禹祥，張元長爲之作傳。

賄賂之盛莫如此日。都下有白變黃、黃變白之謠。蓋前此以黃鏐代白鎔，取其易于挾持。近又以美珠代精金，其挾持尤易。而人不覺也。曾見餽遺名刺書經橐幾冊者，卽黃金幾兩，而詭托刻文朱仲晦疏云：今之在位，以金珠爲肺醢，以契券爲詩文。今直以金珠爲詩文，又一變局矣。

崇禎辛巳元日大雪，至十四五日雪勢尤甚。城內外合抱之木俱被損折。連日陰霧凝結，天雨木冰，飛鳥絕跡。是歲親藩被難者，福、襄、唐三王宰相則薛觀國、楊嗣昌一死于法，一死于軍前。尙書侍郎則呂維祺、傅宗龍死寇，鄭崇儉死獄。巡撫而下，又不可勝紀矣。劉向曰：冰者，陰之盛。木者，少陽貴臣卿大夫象也。應在此人將有害。以是歲驗之，益信。木冰一稱木介，介又甲兵之象。

紹興庚辰正月四日，自虹縣至青陽驛。雪雹大作。木介彌望海陵周麟之作詩云：雨木冰貫珠絡玉千葩。明橫鞭一拂柔條動寶釵。墮地聲鏗鏘。昨日登車天地黑，怪雨盲風起東北。俄然散雹飛亂霰，流淖滿途深沒膝。前車折軸不得行。後車脫輻泥翻轆。曉來廓氣天宇清，萬象奪目何晶熒。凜如介士執矛戟，四野列陣霜雪凝。汴河堤上民驚詫，問是何祥。木冰稼生平有眼未曾看。舊說惟聞達官怕，車中囁嚅齊魯生。嘗學五傳窺遺經，因言前哲論災異。占曰：庶人皆執兵，只應此地干戈起。草木如人兩相倚，莫

憂蕃馬飲泗水盡道明年佛狸死至辛巳金主亮大舉入寇虞允文敗之于采石亮趨揚州金兵亂弑其主亮焚之北還海陵末句遂成詩識然則雨冰之變其應不獨在達官矣

唐州多曠土熙甯中詔募民蓄墾治廢陂復召信臣杜詩之迹衆憚其役之煩難莫敗舉王逢原夫人吳氏方寡居因其兄田于陂旁慨然謂衆曰吾非徒自謀陂興實一州之利當如是作如是成乃闢污萊均灌漑身任其勞築環隄以瀦水疏斗門以洩水未幾壞化膏腴一方利賴夫人歲入亦累鉅萬悉捐以賑窮乏周疾苦闔州甚德之爭訟不詣有司悉就夫人聽決州以其事上聞詔賜絹一千疋米一千石近代吳長卿傳奇女子如高涼洗夫人甯化晏氏竝有功德于時卓犖可紀惜未有以夫人之事告之予家藏逢原廣陵集得王雲所撰夫人墓碣因爲表彰逢原名令王介甫愛其文章節行而推爲天民者也

彭淵材嘗從郭太尉游園自詫曾傳禁蛇呪試無不驗俄園中有蛇甚猛太尉呼曰淵材可施其術蛇舉首來奔淵材反走流汗冠巾盡脫曰此太尉宅神不可禁也近時將帥兵法大率皆淵材蛇呪耳友人楊機部贊畫盧公軍前遇各營來請馬者楊笑曰逸足無幾不能應君反走之需其人報顏而退

崇禎壬午三月有自北來者傳新政數事快殊人心而戒廠衛起廢逸尤爲卓犖然邪正倚伏之關政于此時當爲深慮林見素寄陽明先生書云言路開矣高取難煩取厭則開者恐塞幸門塞矣短取媒隙取伺則塞且開有味乎其言之也

近日流寇俱稱死賊各處塘報皆然其僭號稱王者章奏文移悉改王字爲枉或爲亡如所謂八大枉爭世枉左衿枉是也予按國初亦有此例江陰李翊云余家先世分關中寫吳原年洪武原年俱不用元字蓋當時惡勝國之號而避之故民間相習如此

紹興唐琦本衛士建炎閒高宗航海琦病畱越州李鄴以城降金人琶八守之鄴方與琶八竝馬行琦從後持一大斂祝曰願天一擊殺兩賊斂中馬不殺被執罵賊不絕口琶八謂曰汝欲何爲死曰我願以布裹灌油燒焚三日示媿降賊之臣卒焚之其意恐琶八追及高宗欲以緩其程也事聞詔爲立廟長簷街賜名旌忠明沈周爲作詩云一斂真如博浪鎌事機不偶亦空施降城未分身無用罵賊猶知舌可爲膏火願延三日死海天能信六龍馳長簷街上春秋祀李鄴魂應媿此祠琦事顛末載于碑刻者如此紹興志但據宋史書之至布裹灌油之事則未之及也琦以執殳下士而大節屹立乃爾國朝有金川門守卒龔翊者崑山人值靖難兵入大哭遁去隱居教授宣德中周忱撫吳薦爲學官辭不就曰恐負往日城門一慟耳翊雖不能如琦之轟烈亦庶幾逾于其儕偶多矣

蘇子瞻在海上時號鐵冠道人國初亦有鐵冠道人則臨川之張中也

近時奔競最甚無如銓選考試兩端督學試士已不免竿牘紛沓若郡邑之試請囑公然更不復略爲諱忌至有形之章奏令童子納金助餉無使縉紳專利者按此風亦不始于今日胡忠簡何等入品偶讀澹菴集有與藍守師稷書云某復見鄉中小童郭洵直穎脫不羣淹貫九經諸子以應科目委得允當

自非郡大尹樂育有方。善誘不倦。何以及此。謹採之輿論。仰溷高明。伏乞台慈。特賜收錄。則忠簡亦嘗爲郡試緩頰矣。然忠簡生平仗忠信以感人。所謂穎脫淹貫。定非虛語。此札實爲憐才而作。非時輩之所可借口也。

歷法莫如近日疏忒。徐元扈相國、李性參勳卿屢經推驗。竟成聚訟。只以崇禎己巳日食一端言之。據大統推算。食三分二十四秒。初虧已正三刻。食甚午初三刻。復圓午正三刻。據回回歷推算。食五分五十二秒。初虧午初三刻。食甚午正三刻。復圓未初三刻。用新法推算。順天府食二分有奇。應天府六分有奇。杭州府六分三十秒有奇。廣州府九分有奇。瓊州府食既。大甯、開平等處不食。初虧己正三刻。食甚午初二刻。復圓午初四刻。三家互相抵牾如此。然至期參考分數。則順天府果止二分有奇。新法實與元象脗合。蓋其說創始于利瑪竇。而湯若望、羅雅谷輩繼之。皆歐邏巴博物沿聞之士。其步算較回回更密似。非諸家之所可及也。

金山絕頂有畱雲亭。江光海色。蕩搖四面。記往歲登日觀峰。東望島嶼。西眺河源。誦太白精神。四飛揚。如出天地閒之句。不知其下濛濛者爲何等處也。今日搔首此閒。又是百年一快。畱雲亭舊額久已廢去。今爲俗子改作凌霄閣矣。

淳安縣有小金山。元鄭師山稱其崖洞之幽。錦沙燕石之勝。西湖龜石之奇。金山所無有也。予未至淳安。不知茲山較頭陀洞妙高臺諸勝境果何如。然師山自云東遊京口。念欲一躋其巔。酌中泠泉。以適生

平樂事竟坐他事不果去是鄭君尙未夢見金山面目何得輕置軒輕唐突西子

莊子云盜跖死利于東陵之上丹鉛錄云禹貢導九江至于東陵今巴陵有道士洑地志卽古之東陵盜跖死于東陵蓋據波憑濤以濟其奸兇其地至今猶爲盜巢云夷陵爲西陵則巴陵爲東陵可知愚按莊子盜跖篇云跖方休卒太山之陽似非巴陵升庵應悞

秋水宜晴晴則澹蕩然惟鄱湖浩淼其澹蕩之致乃與晴光俱無盡際非他水之可同也佳絕尤在夕陽澹者愈澹蕩者愈蕩倚窗而睇左右諸山恬漠自如喧萋竝見雖復匡廬之高大亦若融其體勢但以恍惚氣韻醉人之目予友徐巨源作愛秋光賦殊勝文通予亦欲賦鄱湖秋光非擁楫旬日低徊夷猶正恐筆墨蹊徑未去當無奈此湖何耳

韋莊章江詩欲問旌陽舊風月一江紅樹亂猿哀俗本作維揚殊誤莊又有南昌晚眺詩芳草綠遮仙尉宅落霞紅襯賈人船亦自楚楚可誦吾郡山川經唐人題詠者只曲江數篇與浣花集中此二律爲勝耳

徽雨連絲枕簟琴書俱爲溼霧薰蒸大覺肉體爲累忽快風連晨不已如從熱海驟登雪山草木別有清香生于爽氣之內晴久則不復存矣楊升菴據元奘西域記謂熱海在葱嶺北隅證以岑參蒸沙沸浪之句殊誤然參亦自詠炎方暑國耳不必定指此地

予閱文山傳如劉岳申胡廣所撰皆萎蕭不足動人淮陰有龔開者字聖予嘗傳宋瑞事或以爲類司馬

遷惜無從索覽。又癸辛雜識載聖予有呼保義宋江等三十六贊序云宋江事見于街巷談語不足採著。雖有高人如李嵩輩傳寫士大夫亦不見黜。余年少壯時慕其人欲存之畫贊以未見信書載事實不敢輕爲及異時見東都事略中書侍郎侯蒙傳有書一篇陳制賊之計云宋江三十六人橫行河朔京東官軍數萬無敢抗者其材必有過人不若赦過招降使討方臘以自贖或可平東南之亂。予然後知江輩真有聞于時者于是卽三十六人人爲一贊而箴體存焉蓋其本撥矣將使一歸于正義勇不相戾此詩人忠厚之心也余嘗以江之所爲雖不得自齒然其識趣超卓有過人者立號旣不僭侈名稱儼然猶循軌轍雖托之記載可也古稱柳盜跖盜賊之聖以其守一至于極處能出類而拔萃若江者其殆庶幾乎雖然彼跖與江與之盜名而不辭躬履盜跡而無諱者也豈若世之亂臣賊子畏影而自走所爲近在一身而其禍未嘗不流四海嗚呼與其逢聖人之徒孰若跖與江也云云贊語文多茲不備錄按聖予乃宋末遺老忠義激烈大類謝皋羽鄭所南其文章可見者止此近稗海所刻癸辛雜識此文悉遭刪去遂使殘珪斷璧蕩然無存亦搜奇之一恨也。

劉敬山曰文章之妙在于變化故一字而用有雅俗如个字一也國語齊語曰鹿皮四个則俗史記貨殖傳曰竹竿万个則雅矣一語而用有雅俗如諺曰敢怒而不敢言則俗杜牧阿房宮賦曰使人不敢言而敢怒則雅矣一字而用有工拙如土字一也揚子重黎篇曰舜以堯作土禹以舜作土則拙邵子經世曰仲尼以萬世爲土則工矣一語而用有工拙如莊子天地內篇曰殆哉岌岌乎天下則拙孟子曰

天下殆哉岌岌乎則工矣推此可以隨處生悟。

元伯顏等賀平宋表蓋孟祺之筆首聯云國家之業大一統海嶽必明主之歸帝王之兵出萬全蠻夷敢天威之抗又云黍司中闢直指僞都犄角之勢既成水陸之師竝進曰僞都曰蠻夷恣桀犬之吠竟不問所謂華夷者安在千載而下猶足令人憤懣祺爲宿州符離人亦是中原遺黎而忍心悖義乃爾耶昭明選漢詩不取安世房中歌與郊祀十九首鼓吹諸曲殷璠選唐詩凡二十四人卻刪去老杜僧贊甯作僧史正傳五百三十三人附見一百三十人乃不爲雲門立傳人各有意見好樂政未可以常理測也唐之南京在荊州府宋之南京在歸德府今應天府亦稱南京然歸德在宋實曰應天何其與國朝巧合耶。

靖難之變遜國諸死節家皆以黨籍株連其或幸免于覆巢之下者類變姓名自匿黃公子澄之後爲田氏卓公敬之後爲宋氏今卓氏已復原姓而太常遺裔猶冒田姓未改也。

黃楚望先生言孔子非史官何以得見國史策文與其簡牘本末考見得失而加筆削蓋當時魯君雖不能用孔子至于托聖人以正禮樂正書法則決有之如此則春秋一經乃史官先稟命于君而後贊成其事者也又云三桓乃桓公文姜子孫而春秋書法于文姜不少恕如夫人姜氏會齊侯夫人姜氏享齊侯夫人姜氏如齊如莒之類其子孫見此豈有不怒然又如此書所以難看竊意春秋之時雖王綱不辰而史官直筆則世守其法不敢少紊如齊太史書曰崔杼弑其君崔子殺之其弟嗣書而死者二

人其弟又書南史氏又執簡以往晉太史書趙盾弑其君之類可見當時史官執法之嚴雖死不避則夫人姜氏之事孔子或因太史之舊而書之未可知也且天王至尊周人謚以幽厲其子孫亦不能廢公議改之況國君夫人哉

曰今之成人者何必然一節皆子路之語世誤以爲孔子京山郝仲興先生旣已爲之辨矣若陽貨欲見孔子章謂孔子曰來兩段皆是記陽貨之言與孟子知不若與曰非然也一者何也曰仁也同例觀下文孔子曰諾吾將仕矣便見蓋旣曰可乎隨曰不可語意傲肆正與子與汝言句相應所謂小人而敢于狎大人者也

周海門先生云論語中如是知也是禮也是邱也三語如霹靂火眼眨不及是心思路絕處其爲人也云爾則可謂云爾兩云爾哆哆和形容不出是言語道斷處

徐子卿論夫子之文章可得而聞絕不下註脚但云觀世音是聞文章照面周海門論舜爲天子章云孟子發大舜之心乃是雪裏芭蕉空中樓閣

大學誠意章曾子曰者李長卿先生以爲曾子有感于小人而形諸歎也與左傳君子曰史記太史公曰一例非是平日之言

府志載高皇帝以至正壬寅幸龍興謁孔子廟過鐵柱觀復出城開宴于滕王閣諸儒咸賦詩爲樂居民扶老挈幼縱觀燈火明日命存恤鰥寡孤獨放陳友諒所畜鹿于西山放鹿事僅一語及之而已按孔

邇雲蕉館紀談云友諒聚鹿數百畜于南昌城西章江門外謂之鹿園嘗至其所自跨一角蒼鹿綴瑟珠爲纓絡掛于角上縷金爲花羣鹿皆飾以錦繡遨遊江上國初駕至南昌宴于滕王閣命儒臣韓詩放其所畜鹿于西山乃知僞漢有鹿園在吾郡而放鹿之人姓名爲韓詩皆作者之所未考也。

說部諸書如沈存中夢溪筆談洪容齋隨筆王伯厚困學紀聞博極載籍兼之辨析精當直是案頭三種大書非他稗官家之可擬也東坡志林景綸玉露經鋤堂雜志石林避暑錄隨意點染饒有風韻亦令讀者靡靡忘倦若岳珂之桯史高似孫之緯略臃腫鉅飣絕少生動真所謂詭癡符耳。

修宋史者三十人知名之士惟歐陽元貢師泰余闕張翥范素五人而已空谷禪師乃謂揭傒斯之功獨多作宋史似傒斯之功獨多宋史竟不列名于首不知何說考文安公本傳傒斯在館止成遼史有旨仍督早成金宋二史傒斯朝夕不敢休因得寒疾七日卒或以其未成書遂略之耳文安尚有太平政要策惜不得見也。

吉水解觀我先生名觀一名伯中早邃于易諸子百家無不該貫屢舉不第至正中嘗私修宋遼金三史朝廷得其書悉採用之今江右不知有此君不但海內無聞爲之一歎。

王龍舒淨土文解時習之義云若學寬大則于褊隘時習之若學辭讓則于忿爭時習之若學勤敏則于懈怠時習之當慢傲時習之若學良善則于狼戾時習之若學溫和則于忿怒時習之若學恭敬則于其事之時而習則不虛習矣其習必成成則自有可喜故曰不亦說乎數語痛棒熱喝鴛鴦繡出且併

金針暗度矣。儒家第一義，乃于二氏之書發其奧旨，亦禮失而求之于野也。

禪家如明教嵩，如德洪覺範，皆具廣長辯舌，而國朝中吳空谷和尚，亦其流亞。空谷作尙直，尙理二篇，一以闢元，一以闢儒。如云三教之學，乃至琴棋書畫百工技藝，俱必至于變化之地，始得活潑之妙。不然，則在死殺法裏論，亦破的。但論溫公、程子排佛，俱是晦庵所造裁于二家，則架虛強陷甚矣。又謂晦庵將佛法作儒法用，欲歸功自己，所以轉身排佛。今後吾儕或得悟道，設使納交于他宗之子，但以詩文交接，慎勿漏泄元機，當用宋人爲戒。所謂前車旣覆，後車易轍。孔子曰：「於予與改是。」夫苟有所見，正應傾吐密藏，互相証質，期于明道而止。豈有反深加祕惜者？設使眞能屈服，晦庵亦自能止其排擊。彼其排擊如此，中亦必有未安。但患于論之未盡耳。若詆晦庵用佛附儒，彼法中尤多援儒入墨道理，止求至當而已，何得橫著私意，以礙天海哉。

兩年來讀書作文，都無靜意。只辛巳十月，自吳門返棹，舟中更無他侶，隨意取所購新書讀之，欣然會意，都不在尋常詮解之中。壬午七月廿七日，將爲淮揚之遊，阻風章門六日。戚友意謂扁舟已發，無一過問者，因得以其餘暇，科頭散帙，佳想好句，亹亹欲來。憶昔在濟上，向岳石鐘假一舫，題曰「小憩處」，如予之飢寒酬應，擾擾窮年，直賴一片水光帆影爲生平休息之地。政恐石尤之，不我助耳。

吳彩鸞仙蹟，在吾郡紫極宮。今寫韻軒其遺趾也。彩鸞不止日寫韻一部，又寫佛本行經六十卷于導江縣迎祥寺。予旣已詳之，伯生記跋矣。吉安志載唐天寶閒，彩鸞曾遊安成福聖寺，手植兩羅漢柏，觀音

閣前入小室中七日寫法苑珠林百二十軸一夕去不知所往其紙粘連處至今不斷絕彩鸞更有此一奇也傳稱彩鸞與文蕭遇在文宗太和末而法苑珠林則寫于天寶年豈神仙隱顯原非時代之可限歟

周萊峰嘗語王宏宇曰吾于窮通得喪無復嬰情獨未能豁然于死生耳王曰學如用兵須從險處設關據守然後可下城邑子未悟死生則且以生爲樂于窮通得喪能不嬰情哉萊峰甚服其言

近代名家諸集莫如序文爲盛獻壽賀遷報滿送別每事輒須一序而仕宦之吏課鄉會之試錄生童之刻橐山人墨客之遊記無一而不有簡端之弁語揚詡誇耀災及梨棗遂無虛日陳明卿云未有王唐時文秦漢古文而須題端者也可謂名言萬歷閒沈晴峰刻長水文鈔計序文多至二十八篇只此一集剞劂氏已不勝其勞攘矣

陳白陽人知其畫品入神不知其詩歌之妙彷彿淵明又大字逼米元章小字逼歐率更蓋藝苑之兼材也白陽聲稱既著一日巡撫江南陳公以刺邀見白陽曰王公不得召我況中丞乎擲刺于其地謁者以報陳怒甚益迫令見白陽穿破白衣直入轅門大笑陳公曰汝善繪可就此景作一圖否白陽筆墨亂淋少頃雲山如覆蔽以茅屋屋下漁舟點點老翁持竿酣嘯岸傍一人以手招之漁翁作搖首狀大書五言絕句于其端且目中丞曰漁人我也岸傍人汝也中丞觀紙上神色飛舞語言豪軼亟下堂以賓禮見

予以五月登泰山日觀峰披重裘猶不免寒戰四鼓起候日出俄見霞彩萬道碧綠交加有赤盤從中湧出晃灤激射方圓靡定久之乃成日輪因悟氣至此始聚而爲日日生一日非以昨日之日爲今日之日也新吳宋長庚嘗有此議後當有信之者日下白影一線勢若搖蕩居人曰此茫茫大海也

沈晴峰登岱記稱每歲三四月五方士女登祠元君者數十萬夜望山上篝燈如聚螢萬斛上下蟻旋鼎沸雷鳴僅得容足以上予來已後期不及見祈禳之盛然詢之廟祝云崇禎己巳以前每歲香客多至八十萬少亦六十萬今不滿四十萬矣畿輔齊魯以迄中州江北苦虜苦寇半斃于鋒鏑半竄于荆莽何暇禱祀名山未知數年後又復何似聽之惕然

無字碑在嶽頂登封臺下秦始皇立或曰石表或曰神主石或言其下有金簡玉書古今人莫測其意鍾伯敬曰無字碑秦所以疑萬世也一語已盡

手摩紅日登三觀袖拂黃埃看九州元王奕句山壓星辰從下看海浮天地自東迴明趙鶴句泰山自謫仙少陵題詠後若兩君差可不愧登臨

或問慧海禪師修道何功師曰飢來吃飯困來眠曰人皆如此何得爲功曰不同他吃時不肯吃百種需求索睡時不肯睡千般計較乃知日食夜眠政復未易受享東坡志林有措大言我平生不足惟飯與睡耳那知五濁世人誰是飽喫安寢者豈獨此一措大也哉

林貞肅云萬象惟風難畫莊子地籟一段筆端能畫出風掩卷而坐猶覺寥寥之在耳予謂考工記之梓

人列子之泰豆氏寫態摹神亦是化工肖物越絕論劍揚子雲客難俱有蒙莊遺意但未盡酣適之妙耳。

寒夜錄卷下

金華戚雄紀亡宋遺老有名者淮陰龔開南陽仇遠隆山牟應龍紫陽方回永康胡長孺豫章戴表元錢塘鄧牧心又謝翱方鳳吳思齊鄭所南林景曦皆有名能詩若忠義可稱卓然不汚左衽者則翱鳳吳鄭龔林爲無愧耳諸公之外尚有劉須溪唐珏鄧光薦汪水雲溫日觀雄未之及予欲取其大節奇偉如所南皋羽輩者爲作南宋遺賢傳而苦於故老無傳海內知交能出其笥藏以相助亦幽魂之一快也跋予望之

孫樵致歎史才之難以爲唐二百年間作者數十輩獨高韓吏部然順宗實錄尙不能當孟堅其能與子長子雲相上下乎子雲但作賦沈麗耳他文以淺易文艱深最不宜于史才不知樵何以與子長竝稱韓卽不能追步司馬亦未必不高揚雄數等也樵又謂凡稱爲良史者他人費千百言輒能數十字而盡及意窮反若有千百言在筆下則已揭出子長之神髓矣

賢人君子持己接物多爲羣小之所憎妒憎妒不已而毀謗隨之又不特顯爲毀謗已也往往假造篇章托之其人使後世無由辨雪如僞增揚子雲之書比王莽于周公是已吳康齋何等人品集中有忠國公石亨族譜跋而忌者乃以門下士署之陳白沙被召至京誣其潛作十詩媚太監梁芳得授檢討遂捏詩橐傳播周文襄一代名臣雖不必盡違築塈而豪氣自不可掩乃詆其進大士像于中官王振背

識云孝孫周忱拜奉諸如此類出于憎妒之手無疑吁口不已而手繼之胡其不畏鬼責耶顧涇陽以孔子與子路子貢評管仲二章爲齊人誇張之辭而托于大聖鄭端簡以人不堪其憂不義而富且貴于我如浮雲三句直當除去葉秉敬以予欲無言吾與回言終日畏聖人之言旨意相悖三君敢于非聖而不疑而端簡謂介甫譏春秋永叔毀繫辭君實詆孟子兩程子改古本大學晦翁不用子夏詩序爲不可曉何其不明于目睫之旨也

唐杜佑爲司徒嘗言致仕之後買小駒飽食之訖跨之著粗布襴衫入市朝觀盤伶傀儡卽足矣後果如其言宋楊誠齋自祕書監退老南溪之上敝屋一區僅庇風雨長鬚赤脚纔三四人吟咏于江風山月間醉則以天地爲衾枕其高致如此國朝華亭陸文定公樹聲登第四十年在位不盈數載輒以病罷去里居閉門宴坐焚香啜茗卽親戚故人罕接其面如杜如楊如陸誠士大夫退處之規範也

嘉隆以來往還名刺居上者傲而無禮處卑者遜而可笑固是風俗大弊韓襄毅總制兩廣平大藤峽威勢張甚順德錢大尹乃其屬官致韓書簡止稱鄉生錢溥端肅奉復而已邢太守宥瓊州人止稱侍生宥百拜奉書而已後來乃有晚生治生門生晚學之稱不自知其陷于諂媚也詞林非本衙門先輩槩不稱晚又不知起于何時吾鄉有某先輩詞林寓居鐵柱宮傍須謁許旌陽廟某躡屩數番令寫一鄉侍生名刺于神座前焚之長揖而退或謂某曰旌陽是晉時人也須寫一晚生某忿然曰我詞林無此

唐有書生讀經書甚熟不知近代事因說駱賓王遂云某識其孫李少府者兄弟太多意謂駱賓王是封號也宋謝無逸閒居多從衲子遊不喜對書生一日有貢士來謁坐定曰每欲問無逸之事輒忘之聞人言歐陽修果何如人無逸曰舊亦一書生後甚顯達嘗參大政又問能文章否無逸曰也得當時以詩賦取士猶尙涉獵典籍而書生之陋已如此自八股之業既盛尋常史漢俱束高閣況于當代之人物典故哉曾記一舉子問予中山王是何姓名予曰姓徐名達舉子曰此自是老魏國公耳中山王恐另是一人

祖制省直有巡道無守道凡守道俱添設故官止用關防巡道則用印巡撫亦係添設故亦止給關防凡添設官皆無印也崇禎初虜寇之變南北設督師總理俱給關防盧公象昇勦賊楚豫軍中失去總理關防朝廷置而不問後賈莊之敗又復失去督師關防范公成六于賈莊尋得之寄晉州庫盧公忠勇自不減于睢陽惜其料敵未盡耳

菜根譚云幽人清事總在自適故酒以不勸爲歡棋以不爭爲勝會以不約爲真率客以不迎送爲坦夷若一牽文泥跡便落塵世苦海矣

予署長興二月閒詣顧渚山致祭後數日採茶童子以黃紗籠盛本山新茶入邑予朝服鼓吹迎之郭外蓋此茶採以薦高皇寢園故其禮特甚盛非如他貢物比考輟耕錄湖州長興金沙泉唐時用此水造紫筍茶進貢泉不常出有司具牲牢祭之始得水事訖卽涸元亦倣而行之賜名瑞應泉今但祭山而

不祭泉似當補此缺典。

宋時炳子以詩擅名。同時有九僧。歐陽公嘗稱之。九僧之外。祕演、惟儼、參寥、善權。皆其甚著者。參寥有集十二卷。曹能始選歷代詩。竟未之入。止存再遊鶴林寺五律。夏日龍井書事七律而已。予喜其廬山雜興諸作。今選五首附此。衆峰勢連環。萬疊不可窮。香爐獨秀拔。佳氣嘗葱葱。長風捲遊霧。曉壁開曠曠。招提出其下。樓觀掛青紅。回眸盼五老。刻削金芙蓉。宜乎謫仙子。愛此巢雲松。又少文好山林。每往輒忘歸。余生千載後。獨與斯人違。竭來爐峰下。結宇聊棲遲。長林拱茂木。九夏遺炎曦。溪雨晝忽破。藤花照清漪。黃鸝語深林。可聽不可窺。又龍湫亘三峽。草木皆森奇。禪餘得支徑。別塉行逶迤。上人吳門秀。邈有方外姿。芒鞚襯兩足。策策欣相追。秋田罷刈穫。雲水明空陂。雙雙林中禽。文彩光陸離。雍容事飲啄。相顧忘驚飛。鮮飄忽騰馥。岳桂飄葳蕤。峰端臥落日。眷此忘還期。又山深雲物清。挹玩洗浮慮。昨日行澗南。飄然卽芒屨。風潭耿危約。晚與樵爭渡。隔水認梅花。方驚歲華暮。幽人渺江海。樂事期誰預。山月獨多情。娟娟遲歸路。又五更山雨餘。海月漏雲表。流輝入庭戶。炯炯白如縞。百舌語空林。關關催欲曉。衆禽亦和鳴。爲我釋孤抱。杉松本奇姿。洗滌看愈好。惆悵桃李花。東風捲如掃。蘇黃門每稱參寥詩體製絕似儲光羲。讀此數章益信。

參寥本以絕句而傳。其佳處尤勝諸體。如春風隨意可嬉娛。水有舟航。陸有車。應笑揚雄未忘我。閉門猶著解嘲書。如去馬來車聲已闌。雪雲低壓暮簷。寒地爐山。枮燒初熟。輭語聊爲世外歡。如中流出沒一

舟虛緩楫長謠彼自如聞說古來江海上達人一半寄樵漁如清溪白石曉磷磷洗霧桃花兩岸新欲覓劉郎家住處但聞鷄犬不逢人如白水茫茫天四空黃昏小雨溼東風五更百舌催殘夢月到官河柳影中如雨暗蒼江晚未晴井梧飄葉動秋聲樓頭夜半風吹斷月在浮雲淺處明如高松夾道夕陽明抱葉風蟬引細聲勸爾行人聊駐足出山無物更能清如竹裏鳴鶯曉欲飛遽褰疏箔望朝暉莫嫌山色經秋瘦我亦秋來解帶圍如古槐花落小中庭夜半風來捲月鳴鶯水先生如尙在呼兒應問此何聲瀟灑高曠絕不似食烟火人豈特臨平藕花之句堪入圖畫已耶

唐柳冕與權德輿書云自頃有司試明經奏請每經問義十道五道全寫疏五道全寫注其有明聖人之道盡六經之意而不能誦疏與注一切棄之恐清識之士無由而進腐生堅子比肩登第不亦失乎吳郡王弱生曰明經一途本爲士之朴魯者設當時原有焚香禮進士噴目待明經之語柳謂全寫注疏正爲此耳然朴魯之士世間亦不可少觀後世科場所得恐不如全寫注疏之人遠矣

嘉禾李君實云顧渚前朝名品正以採摘初芽加之法製所謂罄一畝之入僅充半環取精之多自然擅妙也今碌碌諸葉茶中無殊菜藩何勝刮目

應天府溧水縣有中山保定府蠡縣亦有中山湖廣黃州府有赤壁山西霍州亦有赤壁蜀有峩眉山會稽亦有峩眉燕京西七十里有仰山袁州府亦有仰山南陽唐縣有桐柏山天台亦有桐柏山河南登封縣有少室山鄧州亦有少室山太原府有五臺山嘉興亦有五臺山濟南府有歷山延慶府亦有歷

山

元歐陽原功云江西詩在宋東都時宗黃太史號江西詩派然不皆江西人也南渡後楊廷秀號爲新體詩學者亦宗之雖楊宗少于黃然詩亦少變宋末須溪劉會孟出于廬陵適科目廢士子專意學詩會孟點校諸家甚精而作多奇崛衆翕然宗之于是詩又一變原功名元其記吾江右詩變甚悉世但知分甯之派而已不知更有楊劉兩派也元則揭曼碩明則劉槎翁皆著名于匡廬彭蠡間成宏而降反似遜于前代無亦舉業之爲累乎

王秋澗云作文亦當從科舉中來不然豈惟不中格律而汗漫猖披無首無尾是出入不由戶也此論亦是確言每見未曾爲舉業者作詩或有好句爲古文輒不解布局措詞之法雖之乎者也往往安頓不妥固知須從此徑入來秋澗名憚元人

國朝天官家記載異聞三事正統己巳晝刻三十九夜刻六十一宏治壬戌三月十六日月食起戌初刻終亥至期救護不虧萬歷丁巳正月十五日月食戌初二刻食旣戌正三刻食甚共食十一分有奇是年七月十六日又食至十二分二秒此皆前史之所罕見惟宏治之占爲人君有道而天應之餘俱未爲吉祥

陳恭愍公選天順中以御史督南畿學政盡列諸生姓名竝不彌封曰吾不自信何以信于人胡靜菴先生世甯以左都御史掌院事時當考察執政請禁私謁公曰臣官以察爲名非妄其說聽其言無以察

其心之邪正才之長短若屏絕士大夫徒按考語則毀譽失真而求激揚之當難矣光明卓犖如二公尙何嫌疑可避編號糊名杜門謝客其爲私竇逾甚祇足明其自欺而已

松陽葉希賢遜國時御史壬午六月從建文帝出亡削髮爲僧號雪菴和尚元雲中李元暉旣出家亦名雪菴嘗題顯宗墨竹詩云春滿承華睿思舒墨君別有聖工夫如何整頓乾坤手不寫皋陶大禹謨周程大儒著作擬于六經豈屑以篇詠見長然偶爾落紙多有風人所不能到者元公經古寺云琳公金刹接林巒一徑潛通竹塢寒是處塵埃皆可息時清終未忍辭官誦之道氣藹然明道先生題凌霄三峰云長嘯巖東古寺前三峰相倚勢相連偶逢雲靜得見日若有路通須近天怪石似雷鳴谷底老松如雪著崖巔結根不得居平地猶與蓮花遠比肩大有奇崛氣若咏草句莫爲枯榮吟野望且憐愁醉祝香輪又幾興近代楊孟載韻頌信賢者之不可以一端測也

邵康節先生有芳草短吟花閒水畔綠如茵興廢曾經漢與秦占斷山川無限地愁傷今古幾何人嚴霜殺盡還逢雨野火燒殘又遇春無那路傍多此物王孫歸思若迷津當是擊壤集中絕唱
俞紫芝秀老王荊公客亦有咏草一篇云滿目芊芊野渡頭不知若箇解忘憂細隨綠水侵離館遠帶斜陽過別州金谷園中荒映月石頭城下碧連秋行人悵望王孫去買斷金釵十二樓邵程俞揚于此題中直似江淮河濟稱四瀆于天壤也

四友齋叢說云元人虎頭牌十七換頭落梅風云抹得瓶口兒淨斟得盞面兒圓望著碧天邊太陽澆奠

只俺遙女直人無甚麼別呴。願則願吾弟兄們早能句相見。一友人曰：此似唐人木蘭詩清波雜志云。秦少遊柳州詞霧溼樓臺月迷津渡桃花望斷無尋處可堪孤館閉春寒杜鵑聲裏斜陽暮驛寄梅花魚傳尺素砌成此恨無重數郴江幸自繞郴山爲誰流下瀟湘去黃山谷曰語意極似劉夢得如此擬古人方是慧心妙識作詩作文皆應從此悟去。

豫章在宋以詩文著者黃山谷胡少汲也少汲名直孺孫鴻慶稱其筆力雄贍語出驚人嘗有春日絕句風雲吹絮柳飛花睡起鉤簾日半斜四海隨人雙燕子相逢處處作生涯。

佛老之徒能究心吾儒六籍爲之傳注者有僧一行周易論三卷大衍元圖一卷釋惠琳孝經一卷釋贊甯論語陳說一卷釋契嵩中庸解五篇陶貞白孝經論語集注三卷麻衣道者正易心法一卷又潯陽落星山澗有五松橋乃惠遠法師與殷仲堪席澗談易處元時太倉州海甯寺僧善定日與學人講說四書不倦人稱爲定四書數君子經藏之外乃能闡揚聖學意其書必有可觀也。

壬申閒土寇衝臨汝宜黃崇仁樂安三縣甚被蹂躪村落盡空一日天忽雨黑黍殼堅類蕎麥春之得小米色白煮以療飢貧民多賴全活庚辰辛巳南北奇荒死者枕籍廬鳳閒產一種土滑膩微似麥色和糠作餅食之名觀音粉又江北偏地生人面豆眼耳鼻口居然人形飢者採煮羣噉未有不旋踵斃者或曰此兵刃冤魂之所化也予有人面豆詩云渴勿飲鳩鳥血飢勿食人面豆莽莽淮徐郊白日竄雠犴糠粃啖已空粉泥亦難糅掠人呼爲羊脾裂甚猛獸所憐脂膏乾未足充糧糗尤來大搶驟風

雨瘦人死盡肥人肺冤魂化作人面形大豆小豆落區卦農皇未知岐伯迷飢來豈暇細詳瞶採之盈掬延喘息一粒入口橫黃泥吁嗟乎九六之厄良可慨其菽殺人如烏喙何況金戈與鐵鎧

萬茂先訪予長興別未三月客死維揚風雅真摯如此君此世界中斷不能再見斯人矣每念輒爲濡睫生平詩橐托之孫孟樸尙有二卷不知寄付誰氏也臥病時近體絕句鄭超宗爲之授梓名曰廣陵散超宗影園分賦黃牡丹七律猶自光燄萬丈其一石欄行處亂聞香紅紫光中別有粧側面檀痕搖翡翠重樓瓦色照鴛鴦鄧通鼓櫂臨花陣豪客輕衫過粉牆金帶橫開清賞後廣陵佳事屬姚黃其二淺碧深紅處處逢青黃何意漏秋容鶯身近戶光相照蝶翅驚丸蠟自封影伴穀城憐石瘦愁連古蹟覺沙濃遙知九錫東封候獨立宣麻近九重其三三千隊裏鬪春暉獨洗閨粧見自稀步月故披君后服行春偷著聖人衣野花過蝶風深淺斗酒聽鷺色是非爲裏爲裳君莫問六宮齊拜上皇妃

洪覺範云南昌千嶂深秀處忽生水沈奇材萬峰繞之遂名香城李長卿先生西山志晉沙門曇顯創大殿焚香禱于崖山側忽生香木大堪爲柱殿成每誦經佛前以木屑焚之香聞數里故曰香城香城之名始此頃有妄人作西山勝略謂隆安中某禪師自西方來時遇亂盜賊縱橫禪師然長香數百插山前香煙結成雲霧圍鎖茲山賊至但見懸崖陡壁遂不能前真嘵語也

許旌陽鐵柱世共知之又有修行鐵鐘在遊帷觀事見雲笈七籤又旌陽古鼎在西川德陽縣高三尺五寸圍四尺五寸兩耳高五寸龍虎雕畫細如毛髮其質非鐵非石體作丹砂駿文鼎中黃金可百餘斤

昆明傅順孫令德陽掘得之。將還其家。未幾子孫侈費蕩盡。錐立不能存。蓋旌陽爲令茲地。因歲荒作丹代民租。以其餘瘠地中。俟異日不能租者。而順孫私爲已有。不免招神之罰耳。國初貢紙歲造于吾郡西山。董以中貴。卽翠巖寺遺址。以爲楮廠。其應聖宮西皮庫。蓋舊以貯楮皮也。今改其署于信州。而廠與寺俱廢。

西山鶴嶺祀王真君。或云王子喬。按西山別記。王君名迪。宋熙甯中人。有仙術。嘗自臨鏡照。見羽衣星冠。後爲洪州左司理民。有爭訟。枉直立辨。州無冤民。台司表其政聲于朝。方召用。卽掛冠隱西山。跨鶴徧歷峰巒而去。是則鶴嶺之所祀真君乃王迪也。以爲子喬殊誤。

洪州藝文散逸者不可勝數。只以章江一寺言之。宋韓熙載有章江寺碑文。潘慎修有章江禪院記。又禪林寶訓有章江寺集。今皆蕩然無存。

吾邑裘元量先生。名萬頃。宋隆平中王容榜進士。與胡桐原、萬澹菴、徐竹堂往復唱詠。號爲四傑。元量尙有詩集行世。三君已湮沒不傳。吾邑亦不知有四傑之稱矣。

香城寺後二里。許碧雲菴。石刻宋元詩頗多。僅元僧同谷一絕可誦。詩云。半空飛瀑掛巖層。六月生寒水亦冰銷。盡許多塵劫事。碧雲深處一閒僧。同谷延祐中香城住持。

郡城東南普賢寺鐵象。南唐時物。鄉先輩王中翰仲序有詩云。珠纓玉轡路巖嶺。猶似千秋舞舜韶。西去渡河天廣大。北來浮海雪飄蕭。銅駝荆棘徒遺蹟。金馬邱墟不可招。況此梵王空色相。送君極目益蕭

條中翰在京師送別六十六首皆以豫章名勝爲題示不忘故鄉之思此篇其一也滕王閣句暮雨高樓非昨夢秋風殘蝶似新圖甚爲當時傳誦

中翰又有豫章臺弋苑江驛諸作豫章臺已久廢弋苑江驛俱不識舊基安在二百年閒滄桑如許況于唐宋渺茫之蹟哉

鄭剛中著周易窺餘起屯蒙迄未濟獨不注乾坤二卦自言易者天地之奧乾坤又易之奧聖人妙易書之神而藏之乾坤未敢輕談也自屯蒙而往以象求爻因爻識卦萬有一見其倣佛則隨子索母沿流尋源乾坤之微或可得而探耳

竹坡詩話云凡詩人使事要令事在語中而人不知周德清云明事隱使隱事明使皆得使事之三昧者然妙在想尤在掀翻舊案

王無功歌咏但取會意不肯與悠悠閒人更相唱和貫休每得句輒云如此詩只堪供養佛耳下筆須有如許情懷方能亭亭物表蕭賁作山水圖咫尺之間便覺萬里矜慎不傳自娛而已風人都不可少此也舟過吳城山索古今詩刻讀之都不暢意因憶李白洲有阻風吳城絕句云吳城山下水連天三日東風繫客船忽見一人城裏至府公來送買魚錢又白頭浪裏繫孤篷漫向江頭問令公五老峰前誰作主滿江都是打船風白洲才具自是軒昂惜其晚節竟同蔚宗悖逆真可哀也

宋劉道原先生同司馬文正公修通鑑別纂外紀附通鑑行世又纂十國紀年亦錄本進呈其橐藏家文

正公序世不多見其書崇禎末姜希湖前輩遊西山住霞源義塾予同歐子憲萬謁焉因同劉尹躬過掘岡尋熊西雨舊址止于尹躬宗人劉光祖宅光祖出其先世所藏司馬文正序手蹟相示先賢典型讀之起敬此世寶也尹躬光祖其謹護藏之

予友朱禹卿宗侯登泰山五律雞鳴登日觀雪隱一峰青天地只如許鬼神徒杳冥陰晴雲日日齊魯曉星星漫道碑無字秦原沒五經高秀迥出衆作禹卿有雪堂選詩徐巨源稱其幾欲與王江甯常盱眙張文昌韋左司分席元白而下不足擬也世人貴遠而忽近若禹卿者固當不磨于異日耳

周禮多奇字禮記多借字周禮鳳洲卮言已筆出矣今聊記禮記假借字于此拾級聚足涉音以快拘而退拘音立視五燭攢音國中以策彗卽勿勿音遂逾竟爲壇位壇音善天王登假假音天子當依聲依上相見于郤地郤音庶人之摯匹音鷺已上曲禮何居姬頑乎其至也懶音夫子之病革矣革音敗于臺駘臺音綱練設旛叨音填池推柩而反之填音奠喪事縱縱總吉事折折音提瓦不成味音牀懸棺

而封

紺衣紺音

齊穀王姬之喪谷音

舍奠于墓左

釋音

咏斯猶搖音

設奠娶柳音

我喪也斯沾音

覲曹桓

公卒于會桓音

襲莒于奪兌音

與其鄰重汪踦往童音

衣衰而繆絰衣音

已上

檀弓一命卷衰

君紂以爵黜音

已上王制宿離不貸

武經術音

鮮羔開冰獻

命國難那音

母有壞墮音

怪鹿角解駭音

母有差貸音

二燒薙音

觜觿音

多積聚恣積音

大曾擊旁磔音

已上月令賄貳承贍音

剗音箴告于甸人告音

已上文王世子矜寡矜音

穀于地穀音

越席越音

君者所明也明音

其居人也則音

曰養義音郊板藏音已上禮運繁縟盤音大圭不琢篆犧尊莎音夏父弗綦忌燔柴于奧音詔侑武方無武音肆夏陔音已上禮器饗禘禮旦明之義旦音鹽諸利鹽音雕幾音鱠羶蕕音馨腥肆音剔汁獻莎油辟弭已上郊特牲唾沫音替燬潘翻濡魚卵醬卵音蠅皆有軒音浮母模音已上內則元端冕音諸侯荼舒再命緝衣緝音揄狄揄音緝衣鞠音純組綏緝音揚休煦音已上玉藻鷄夷音明堂報葬趣喪服繫之以姓繫音大傳言語之美音儀祭膾音許少儀謾聞小謾音蛾子蛾音學記使其寔音至雜記大胥音太姪娣姪音綠中角音僞荒幌音帷君葬用輜船音士葬用國車音車已上喪大記相近音祖祭法易直子諒音慈告怨資同緇衣雞斯纏音笄問喪墓門圭竈寶儒行右禮記假借字蓋漢儒傳寫失其真者專門之家音猶存古其有重見如拘革封貸壞碟聲越犧幾軒端報數字者止舉其一以見凡也今讀禮記者不復用古音故表出之使考古者三隅之反不致金根之陋耳

秦人洞一在南昌城齊源嶺側一在常德府桃源縣南一在福州城東東山一在永州吳望山當時避暴虐之君而扶攜以往者處處有之不必定指某爲眞蹟某爲僞名李端好以助語入詩寄盧綸云及此時方晏因之名亦沈又云勿以朱顏好而忘白髮侵下第云幸得皮存矣須勞翼長之寄薛戴云夫君又離別而我加寂寞頃鍾譚多用此體乃效顰者至滿篇而已累牘之乎真足令人噴飯端有古別離二篇當爲本集之冠

吾郡李公璣有諸經疑義其論詩每以小序爲主嘗言集傳說詩在章句之內小序說詩在章句之外二

說宜竝存之。蓋章句非集傳不明。言意非小序不得。諸儒專于序說。然序說亦間有出入處。晦翁一
剝去似非大公小序之失。特十之一二耳。豈容盡廢。如行葦之忠厚。既醉之太平。鳬鷺之守成。假樂之
嘉成。王皆得言外意。而非徒泥章句者何也。觀其篤親親之恩。而弗遠。則忠厚可稽。觀其醉酒飽德。而
稱願允祚之隆。則太平有象。觀鳬鷺之祭。享雍容。則接神人各得其道。非能持盈守成者乎。觀假樂之
顯顯令德。而宜民宜人。非成王其孰能當之。小序去古未遠。其爲說必有所授。況義自可通。如之何其
廢之。

李公又云。宣王封申伯。而吉甫作詩美之。極稱其德業。一則曰維周之翰。一則曰周邦咸喜。戎有良翰。一
則曰不顯申伯。文武是憲。皆溢美也。何以見之。幽王廢申后。申伯乃以犬戎滅周而弑君。其罪通于天
矣。前之所謂蕃宣良翰。而操此萬邦者。又安有哉。

載獵歇驕。王雪山、嚴華谷、戴岷隱三家。俱以爲田畢而遊園。載獵于輶車。以歇其驕逸。應從之。朱傳以犬
之長喙曰。獵短喙曰。歇驕似出意度無據。

爾公爾侯。逸豫無期。慎爾優游。勉爾遁思。解者不一。嚴華谷曰。此美賢者退居之樂。謂爾賢者若爲公爲
侯。則將勤勞國事。無有逸豫之期。今爾肥遁。優哉游哉。足以自樂。願加保重耳。

夷狄而中國。則中國之春秋之恕也。包承在小人。則吉之大易之恕也。


太甲王祖桐宮居憂者。居仲壬之憂也。桐宮成湯陵墓之地。必仲壬附葬于桐。故伊尹有營宮之謀。序云。

太甲既立不明伊尹放諸桐三年復歸于亳孫季昭示兒篇謂放當作教以篆文相近故譌爾

康王之誥惟周文武誕受美若諸儒或以爲出羑里之囚而天命始順或以爲羑里逆境而文王順處之或以爲天所眷祐或以爲厥若之誤其義皆不通周洪謨曰按韻書美善也若順也誕受美若者蒙上文而言皇天改大邦殷之命惟周文武大受而順善之也大受者見其極負荷之量善順者見其有靈承之實也此二句與君奭所謂天降于殷殷旣墜厥命我有周旣受同意



濟南紀政



徐榜著

濟南紀政

本館據涇川叢書
本排印初編各叢
書僅有此本

濟南紀政

明 白水徐 榜著

卻酒

章邱有能釀羊膏酒者，飲者評之居露酒上，稱佳釀也。一日章邱令挈十瓶遺郡長，郡長卻之曰：繁縟小物，孔子惜之，防其漸耳。章邱故未有以此酒遺郡長者。自公作俑，恐繼之者濫觴矣。強受二瓶，薦先子木主，謝不恭，餘盡卻之。嗣後州邑不敢以長物獻。

方書

萬歷甲午東兗大饑，濟南少得歲。當事者軫念救荒之令無日不下，而指意殊。州邑有司莫知所適從。余亦有難於左袒者，以手書示之曰：院道之所指授擘畫，猶方書也。至察其寒熱虛實而增減去取之，則在胗視者，倘無病而服藥，則反爲恙矣。有司解其意，政不徇人民獲安堵。

不事苛刻

山東爲神京左輔，聲息易達。宦遊者往往以風力博名高，吏治尙深刻。州邑有司有數月而左遷，未朞月而罷去者。濟南太守惜之，每註考輒請於當道者曰：核吏貴精，當不貴苛刻。彼入貲與刀筆起家者無論已。夫科貢之士，白首窮經，其研弄之辛勤，猶之吾也。父母妻子思得升斗祿以終身，何異農之望歲。其俯

仰之情猶之吾也。吾官二千石，儼然施金衣紫矣。且戀戀然不忍去，渠方籍名而遽除名，奈非人情何？當道者莞爾而笑曰：如郡長之言，必縱奸養寇而後可也。若百姓何？太守曰：奸寇何可縱？如果一朝不可居於民上，遑恤一家之哭哉？第今之謫逐者，頗多爲罰穀數十石，贖錢數十金而已。此弊吾輩共犯之，大臣不法，而惟責小臣廉也。豈絜矩之道哉？當道艴然，太守告揖而退。

回生

兗大饑，滕縣有徐生者，攜其家六口，乞食於濟南，至肥城。一子爲殍，而徐生亦大有饑色。一日謁太守於演武場，見其精神恍惚，語言荒亂，固知其爲饑民，不虞其果爲儒生也。票歷城與之錢五十文，除賃歇宿外，曾不能一凟。異日復哀告於府，再訊之，始知其爲滕庠生，并攜有妻若子女也。太守不難於授食，而難於授室。因謀諸左右，聞老嫗周寡婦者，有茅屋數楹，議官月給賃銀若干，居之芻米計口而給，噫嘻！徐生之夫妻子女，浸浸乎有生氣矣。居無何，徐生爲厲氣所侵，大病疫，子女俱染，幸室人無恙，猶可供炊爨。一朝徐生病劇，且死去。見閻君司命者，查其籙，當不死。令鬼差押之轉行，至跑突泉，差曰：覓泉飲，卽甦。徐生欲飲，司泉者拒之曰：泉神已禁民間毋汲三日矣，不許。頃見白雪樓一紫衣官叱之曰：此滕邑儒生也，胡禁爲亟飲之？守泉者持金盆盛水與飲，見盆底有海日重光四字，大飲數口，神氣頓爽。因問守泉者曰：此樓上何官長？曰：此范君文正公。今之濟南太守元神也。徐生病可述，其事告太守。太守笑曰：有是哉？總歸於夢耳。子入濟以來，太守未嘗一日忘子，故子卽死去，未嘗忘太守。若曰范君爲元神，則吾豈敢延之明。

年四月竟大有年助其行資遣之歸後得一第遂卒

燭冤

有楊朝付者嶧縣人因避荒攜妻女之淄川居焉朝夕無度淄民趙守道爲之計畫鬻二女爲旅資守道因取說合錢七錢朝付啣之一日挾資往金鄉興販適有陶友才者願鬻妻朝付哄之曰淄川有年易於糊口汝妻歸我我與汝錢供朝夕友才唯喏同至治頭店投宿朝付假稱無錢償店家四鼓拉友才同去某人家討錢去店五里許朝付將友才殺死復至店領其婦店主不可曰其夫不在敢與汝領去固留頃之報五里外殺人矣往視之則陶友才也地方將朝付送官扳趙守道在內執訊之加以重刑守道服辜業擬斬刑矣解府太守審其婦曰金鄉來幾日矣曰三日許又訊之曰同行幾人曰楊朝付與吾夫婦二人又訊之店主曰晚間投宿者幾人曰三人太守曰趙守道何以知陶友才到彼乃謀諸朝付而殺之此冤獄矣再審之朝付以情告曰棍歐由我刀殺亦由我守道係仇扳也且凶器見藏彼處押至其地果得凶器將守道釋放未三日而朝付死太守曰天道有神哉朝付先三日死守道之獄終不能解矣太守喜而志之

楊化記

順天喜峰口軍丁楊化爲討軍裝盤費來萊陽主於于大郊之家越數日化陰約大郊去集場買貨戴星而行至中途楊化酒醉墜驢大郊移石枕化之頭令其少睡醒後同行當時原無謀殺意及化睡濃大郊

以手按化之腹見有銀包突出大郊遂起謀意用驢韁繩勒死將屍委之海中棄驢而回村中之人因數日不見楊化共訝之適有死人漂泊于氏之屋畔衆人視之乃楊化也共相驚駭謂不識何賊所害議欲呈告於縣脫地方之罪頃而大郊侄婦李氏在磨房對姑言曰此來者非楊長官耶言畢卽倒地其姑扶之入臥房未就枕席卽跳躍而出門將一老人扯住厲聲大叫曰吾楊化也被于大郊謀死汝輩不爲我申冤我不放汝衆人卽同去拿于大郊審問大郊強辯不認渠卽掌大郊面拽之去其家於竈額前取出原銀大郊無辭里老押解首縣縣官謂事出鬼怪不敢成招竟解撫臺時撫臺乃餘姚孫月峰公也撫臺親審聞李氏之言係喜峰口聲音甚異之發濟南太守鞠問太守拘審見李氏舉動全不類婦人其辯如流言言當其情實問大郊大郊俛首輸服太守不敢遽信次日再訊之如故又次日再訊之亦如故太守嘆曰烏盆報冤得之雜記中今果有是事耶藩臬二司聞之亦拘之親審司道五六人各有辯駁李氏應答不滯司長夏存吾公戲謂大郊曰汝曷不力爲辯脫大郊對曰李氏言言是實何敢辯太守見其情真事確取供招解撫臺旣蒙詳允矣李氏之夫名于得水見李氏真魂不返其子苦於無乳一日哭訴於太守曰李氏彌月作鬼魂不認夫不認子萬無生之理妻死則子必死妻子俱死印亦不欲生矣求太守救之太守大笑曰爲楊化報冤易爲李氏還魂難汝固以難事責我耶濟南城隍最靈應汝曷不告之得水泣告曰城隍木雕者惟其求城隍孰若求府主太守不得已曰汝來朝于府門候之次日太守將該府皂快盡列于傍刑具無數喚李氏聽審上呼揚化李氏隨應之曰小的在太守諭之曰汝附魂李氏爲報

冤耳今大郊議抵汝冤洩矣李氏固有夫有子者可令久之不返使夫無妻子無母耶速去速去遲則重處爾李氏作化語叩首曰小的待兒子來卽去不敢久耽太守曰汝兒子來止收爾骸骨何用李氏爲速去之不去撻汝命左右行杖皂快齊聲大喊李氏作化語叩首曰小的去罷李氏起身外走至儀門太守喝守門者扭之轉令其跪高聲諭之曰楊化不許在吾府汝李氏也將何之化速去不去拶汝命左右行拶皂快又齊聲大喊李氏作化語叩首曰小的去罷李氏又起身外走至儀門太守又喝守門者扭之轉令其跪又高聲諭之曰楊化不許在吾府汝李氏也將何之化速去不去挾爾再命左右行挾皂快又齊聲大喊李氏頃而仆地于得水見其妻死去驚惶號哭太守曰死去便有生機矣令得水抱之起耳邊指其名連聲喚之不醒得水釋放而哭太守又令之抱起仍耳邊指名連聲呼之須臾李氏發戰汗出如雨太守知其復甦令書房出熱茶灌之茶未入口李氏張其目視夫曰吾李氏女也如何在此泣下不能動履令其夫負之出太守以朱筆書數字貼其胸膛戒同行者再毋道楊化姓名犯者重責四十調理數日李氏精神如舊得水率其妻叩謝而行太守虛此獄後去無質對將其返魂事備詳兩院繳句云李氏不復能作楊化語以後會審免提

公初釋褐虞部主事出守濟南至浙江右布政此其在濟南時所自紀其政者也公在濟南凡四年置社學建明湖書院其異政當不止此意公不欲自炫或所紀有殘缺後人掇其餘而刻之也書中所載楊化事舊小說中有之不能舉公名惟云撫臺孫月峰發太守鞠問蓋得之月峰之所記未嘗

濟南紀政

六

見公書故不詳耳。公去濟南日，囊篋蕭然。謂其子文禮曰：而翁以清白吏貽爾子孫以安，不亦厚乎？然則公之治郡，固有其本。若僅以神異驚之，末矣。嘉慶五年十月二十九日後學趙紹祖識。